

**Peniaga Diberi Amaran Supaya Papar Tanda Harga Barang
Bernama
14 Ogos, 2011**

PENGKALAN HULU, 14 Ogos (Bernama) -- Para peniaga diingatkan serta diberi amaran keras supaya memaparkan tanda harga pada barang jualan mereka sekiranya tidak mahu dikenakan tindakan tegas.

Timbalan Menteri Perdagangan Dalam Negeri Koperasi Dan Kepenggunaan, Datuk Tan Lian Hoe berkata pihaknya tidak akan berkompromi jika ada aduan peniaga gagal meletakkan tanda harga terutama sempena sambutan hari raya dua minggu lagi.

Tan yang juga Anggota Parlimen Grik berkata, pihak kementerian sentiasa mengambil berat rungutan rakyat mengenai tindakan segelintir peniaga yang sengaja mahu mengelirukan pembeli.

"Letakkan tanda harga jika enggan dikenakan tindakan," katanya ketika ditemui pada majlis sumbangan bantuan kepada 200 anak yatim, orang kurang upaya (OKU), ibu tunggal dan keluarga kurang berkemampuan di sini.

Beliau juga menasihatkan pengguna supaya tidak membuat pembelian panik hingga membuka peluang kepada peniaga menaikkan harga barang untuk mengaut keuntungan sempena musim perayaan ini.

-- BERNAMA

2011 Hakcipta BERNAMA

Source: <http://www.bernama.com/bernama/v5/bm/newsgeneral.php?id=608040>